



Datë: 11.12.2025
Numër Protokolli: 7906/2025

A.nr.1710/2025

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Ardita Haxhnikaj Demi, kryetare, Malsore Gashi Bajraktari dhe Eshref Shabani, anëtarë, me Avdyl Bekteshi, në cilësinë e procesmbajtësit, në procedurës sipas ankesës me numër A.nr.1710/2025, të datës, 19.09.2025, të parashtruar nga ankuesja F.H, kundër organit të punësimit: Komunës së Prishtinës, në çështjen juridike ‘*kërkese nga marrëdhënia e punës*’, duke vepruar në pajtim me nenin 6, paragrafin 1. nën paragrafin 1.1 dhe nenin 18, paragrafin 1. nën paragrafin 1.2 dhe 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, si dhe në mbështetje të Rregullores Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datë 11.12.2025, mori këtë:

V E N D I M

I. Aprovohet si e bazuar ankesa me numër A.nr.1710/2025, e datës 19.09.2025, e parashtruar nga ankuesja F.H, ashtu që, *detyrohet* Udhëheqësi i Drejtorisë për Administratë të Komunës së Prishtinës, që brenda afatit prej pesëmbëdhjetë (15) ditësh nga dita e pranimi të këtij vendimi, të shqyrtoj kërkesën e ankueses të datës 30.05.2025, lidhur më rimbursimin e mbushjeve të telefonisë mobile.

II. Këshilli i Pavarur Mbikëqyrës për Shërbimin Civil të Kosovës të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Ankuesja (tutje referuar vetëm ankuesi), më datë 19.09.2025, përmes emailit zyrtar ankesa.kpmschck@rks-gov.net, ka parashtruar ankesë në Këshillin e Pavarur Mbikëqyrës për Shërbimin Civil të Kosovës lidhur me heshtjen administrative të organit të punësimit/Komunës së Prishtinës ndaj kërkesës së ankuese të datës 05.08.2025, lidhur me kompensim të rimbursimit mujor të mbushjeve telefonike mobile.

Këshilli i Pavarur Mbikëqyrës për Shërbimin Civil i Kosovës bazuar në dispozitat e Rregullores Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës ka proceduar kërkesën për përgjigje në ankesë, ndërsa, kjo e fundit ka përcjell shkresat e lëndës, duke mos dhënë përgjigje në pretendime ankimore.

Kolegji për Shqyrtimin dhe Vendosjen e Ankesave, për shqyrtimin e kësaj lënde ka administruar këto prova: Ankesën me numër protokolli 6245/2025, të datës 19.09.2025, e parashtruar nga ankuesja në Këshillin e Pavarur Mbikëqyrës të Shërbimit Civil të Kosovës; Akt Emërimit e datës 01.10.2022; Akt Emërimit e datës 16.11.2024; Kopjen e ID-së së ankuses; Kërkesën për përgjigje në ankesë e datës 24.09.2025; Përgjigjen në ankesë e datës 02.10.2025; Emailin e datës 30.09.2025 nga G.P për G.R; Listën e mbushjeve të dërguar me email datës 10.07.2025; Vendimin e datës 19.02.2014 për ndarjen e mbushjeve për telefon; Kërkesën e datës 05.08.2025 të ankuses për trajtim të barabar dhe kompensim për rimbursim mujor telefonik për V.A.

Nga provat e administruara rrjedhë së ankuesja është e punësuar në Komunën e Prishtinës dhe së e njëjta mbanë pozitën e punës Zyrtare e Lartë për Shëndetësi në kuadër të Drejtorisë së Shëndetësisë.

Tutje, nga shkresat e lëndës del së ankuesja më datë 05.08.2025, ka parashtruar tek organi i punësimit kërkesë për trajtimin të barabartë dhe kompensimin financiar për rimbursim mujor telefonik-mobil sikurse kompensohen zyrtarët e lartë, kërkesë kjo që ishte bart tek njësia e administratës, mirëpo, sipas shkresave të lëndës ankuesja nuk kishte pranuar drejtpërdrejt asnjë përgjigje apo sqarim lidhur me kërkesën saj të datës 05.08.2025.

Ankuesja në ankesën e parashtruar në Këshilli për shkak të heshtjes së organit të punësimit lidhur më kërkesën e datës 05.08.2025, pretendon se nuk është duke u kompensuar për mbushje mujore telefonik për pozitën zyrtar i lartë, ashtu që, kërkon njohjen e kësaj të drejte materiale si dhe kompensim retroaktive nga data 01.10.2022.

Kolegji i Këshillit ndërlidhur me rregullat dhe veprimet procedurale të një organi publik, ju referua dispozitave të Ligjit Nr.05/L-031 për Procedurën e Përgjithshme Administrative (tutje referuar: LPPA), përkatësisht: nenit 10, paragrafi 2 ku përcaktohet se: 2. *Organi publik zhvillon procedurën administrative sa me të shpejtë dhe me sa më pak shpenzime, për të dhe për palën, duke mos cenuar çfarë është e nevojshme për një rezultat të ligjshëm e të përshtatshëm të procedurës administrative*, nenit 98 paragrafi 1 dhe 2 ku përcaktohet se: 1. *Procedura administrative nisur sipas kërkesës, do të përfundojë sa më shpejt që të jetë e mundur, por jo më vonë se sa afati i përcaktuar me ligj të veçantë për atë lloj procedure*. 2. *Në rast se ligji i veçantë nuk ka paraparë një afat, siç është paraparë në paragrafin 1 të këtij neni, afati i përgjithshëm i zbatueshëm për përfundimin e procedurës administrative është dyzetepesë (45) ditë nga fillimi i saj, si dhe nenit 97 paragrafi 1 të këtij ligji, ku përcaktohet se: 1. Një procedurë administrative e nisur sipas kërkesës, përfundon me njoftimin e një akti administrativ apo lidhjen e një kontrate administrative, dhe si rrjedhojë në kuptim të këtyre dispozitave ligjore si dhe bazuar në shqyrtimin e provave materiale të çështjes, andaj, nisur nga ky përcaktim ligjor Kolegji i Këshillit konstatoi se organi përkatës i punësimit, në rrethanat e rastit konkret, nuk ka vepruar në pajtueshmëri me dispozitat përkatëse ligjore, në raport me kërkesën 05.08.2025 të parashtruar nga ankuesja, ngase sipas bazës ligjore si me sipër, vullneti i organit publik në realizimin e autoritetit publik formësohet në procedurë administrative dhe manifestohet në formën e njërit prej veprimeve administrative, siç janë: akti administrativ; kontrata administrative apo akti real, dhe se në vlerësimin e Kolegjit, organi përkatës i punësimit, në kuadër të autorizimeve të përcaktuara me legjislacionin në fuqi, është dashur që të shqyrtoj kërkesën e ankueses dhe të njëjtën ta njoftoj lidhur me pretendimet e saj brenda një afati prej 45 ditësh sikurse përcaktohet me nenin 98 paragrafi 2 apo afatit të vazhduar sipas nenit 99 paragrafi 1 të LPPA-së.*

Rrjedhimisht, në vlerësimin e Kolegjit të Këshillit, heshtja e organit të administratës, në këtë rast, Njesisë së Administratës të Komunës së Prishtinës në raport me kërkesën e datës 05.08.2025, cenon të drejtat e ankueses në kuptimin e të drejtave procedural dhe për rrjedhojë edhe vendosjes në mënyrë meritore, ngase, ashtu sikurse është thënë në arsyetim të këtij vendimi, në kërkesën e parashtruar të organi i punësimit, ankuesja pretendon realizimin e të drejtës materiale lidhur me mbushje të telefonisë mobile.

Kështu që, thënë si me sipër e duke u bazuar në nenin 18, paragrafin 1, nën paragrafin 1.2 dhe 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi të aprovoj si të bazuar në kuptim të shkeljeve procedurale, dhe si rrjedhojë detyroj Njësinë e Administratës të Komunës së Prishtinës, që në respektim të dispozitave procedurale të shqyrtoj kërkesën e ankueses të datës 05.08.2025.

Këshillë juridike: *Vendimi hyn në fuqi në ditën e nënshkrimit nga Kryetarja e Kolegjit. Kundër vendimit të Këshillit, pala e pakënaqur e mund të iniciojë konflikt administrativ në Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk ndalon ekzekutimin e këtij vendimi.*

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda: A.nr.1710/2025

Avdyl BEKTESHI

Procesmbajtës

Ardita Haxhnikaj DEMI

Kryetare e Kolegjit

Vendimi i dërgohet:

Ankueses F.H;

Komunës së Prishtinës: Udhëheqësit të Njesisë së Administratës dhe Burimeve.
Arkivit të KPMSHCK-së